

度
支
奏
議

度支奏議目錄

雲南司十四卷

題截漕米掛欠數多疏

覆總督倉場條陳漕政利弊疏

題報山東河南漕糧抵通疏

題通糧廳聞河挑濬已竣疏

覆總漕題衛官貌法誤運疏

覆余漕院條議漕儲運道防設事宜疏

覆應天撫屬漕糧完兌開幫疏

覆知府史應聘輕賁解完開復疏

覆內府工匠免僉車戶疏

覆總督倉場截漕歸併總漕疏

度支奏議卷之十四

太子太保戶部尚書淄青畢自嚴視草

題截津漕米掛欠數多疏

題爲截津漕米掛欠數多謹酌議追補截找以足
軍儲以充海運事雲南清吏司案呈崇禎四年
閏十一月二十二日奉本部送准天津部院翟
鳳翀咨爲嚴追掛欠漕糧事內稱據督餉道僉
事張志芳呈稱奉本部院憲牌開今歲津糧掛
欠五萬七千有奇前准戶部咨開算作截津實

數責令津門自行追比仰道卽將掛欠各官立限嚴追等因奉此隨卽備行兵管二廳遵行去後今據管糧廳喬通判呈稱蒙坐糧廳票發掛欠漕糧武德等衛運官何應科等十九員到廳着令追比但恐一時追比不前准作實在之數倘關寧發運不繼脫巾呼庚甚爲不便相應呈明批示遵行等因據此案查奉截漕糧之例自開運以來津門止以實收之數爲主凡有掛欠俱歸通廳追比蓋因銷算原在通廳且各衛所

簞羹等銀亦在通庫得以就便扣抵故也是以
向來從無在津追比前雖奉部咨行欲將今歲
漕糧掛欠五萬七千有奇算作截津實數責令
津門追比夫徒加追比初無難事津門敢不奉
行惟謹但慮抵作實在發運之數竊恐關寧兵
餉計口授食顆粒不容短少津門按期飛輓亦
時刻不容斷續倘各運官赤手羈津一時補納
不前津門將何物轉輸以資飽騰之効此司運
者不得不預鳴於先以免異日悞運之咎相應

呈請本部院裁酌咨明戶部將今歲掛欠運官
照依舊例發還通廳就便銷算追比至截津之
糧務算見收實數庶得藉以發運方無脫巾之
虞等因到部院據此爲照截津漕糧向無津門
自行追比掛欠之例惟崇禎元年冬截凍糧戶
部始有津門追比之議雖經奉行然官旗有逃
散而行文原籍拘提者有以大小患漂流應豁
而控訴者有以通廳簞羨等銀呈請抵補者種
種非津與聞之事責令追比完糧發運從何下

手竟至行追年餘各弁並無完納嗣於去年三月內復蒙戶部題奉

欽依仍歸通廳銷算追比則既免官旗兩處躲閃之弊復杜賁緣影射之奸法無善於此者今歲津糧掛欠甚夥追比自無可貸戶部以津門不當竟推潔淨算作實在之數行津自行追完發運夫津運關寧糧餉計兵給食不容升合虧額運期有限難以時刻少緩如欲以五萬七千有奇之掛欠抵作來春應運之額糧在通廳既將見

有之竄羨自爲扣抵而欲津門將赤貧之運官徒加敲朴不識果能刻期完納以應運乎抑亦追呼不前可使停舟待運乎此不可不深長慮也况銷算屬之通廳則追比自應還之通廳斷不宜一柄兩持以啓異日閃躲之端也旣經該道具呈前來合咨戶部俯從該道之請將津糧掛欠照例檄行通廳追比仍祈咨會總漕照數撥補來津以便乘時發運等因到部奉批津門漕糧今歲掛欠數多欲不行截補則海運何資

欲照數截補則

國儲大損必須從長與督部津部酌議確妥而後
可以具題非敢以臆定也查天啓二三四五年俱
本部在津之時漕糧掛欠者甚少而今何至如
許之多耶卽天啓六年七年崇禎元年掛欠頗
多然亦原無補截之例若今歲頓行補截數萬
則似大破常例矣雲南司移咨奉此隨卽呈堂
咨行督部津部將津門今歲所欠米數作何處
補從長酌議去後崇禎四年十二月初九日又

奉本部送准天津部院翟鳳翀咨爲懇憐極苦
官旗賠累無償額天超救以甦運困事內稱據
督餉道呈據兵管二廳呈稱查得津門截漕舊
例各衛之米未經晒揚者例取免晒揚米一升
至崇禎二年虜犯畿郊漕糧凍阻愴惶斂入津
城者至百餘萬彼時戎馬倥傯之際不暇晒揚
及至次年轉運京通汜爛虧折爲津門一大罪
案致經收各官賠累未結嗣後凡截津漕糧係
奉戶部坐掣一應收受俱照京通規則盡法晒

揚必期乾潔計其虧折每石不止於五升也今
每石加附餘米五升從來原無此例突爾加增
各官以謂正額尚有掛欠奚堪額外之需所以
稱苦稱累刺刺不休者此也至於腳價一節先
年截留之米俱入北倉水次甚近每石腳價不
過一二文錢今因邊倣未寧遵將漕米盡入城
內南倉水次寫遠所費腳價業經本道詳明本
部院每石議定錢八文細查此項腳價例該輕
賁銀兩動支漕儲則例可考津門原無此項錢

糧故責令運官自備車運進倉訖以致運官與
邦憲等有賠累無償赴部控免附餘請算腳價
之呈總之各官苦累深屬可矜如欲聽其哀訴
一旦徑請豁免萬石之軍需將何所賴如不據
實呈請各官之膚慙不休卑職不敢沉閣此件
亦不敢陳情請豁或照前詳一升之例或照部
文五升追徵出自憲裁等因到道據此該本道
看得今歲津門奉截黃州等衛所漕糧共計五
十四萬四千八百五十四石有奇除掛欠米五

萬七千二百二十四石四斗零實收米四十八萬七千六百二十九石零蓋因上年鑒於通糧未經晒揚轉運虧折致貽津門重累今歲所收之米是以不得不爲慎重又恐各船水兌上倉甘苦不均奉本部院憲行每船四六分派以六分水兌四分上倉仍嚴禁各項旁費先以乾潔者撥發海船水兌過米二十八萬八千七百六十八石零其餘上倉者恐過冬蒸折復加晒揚方運入厰米十九萬八千八百六十一石四斗

零每石虧折不止五升今部文槩欲加附餘米五升津門敢不奉行惟謹第慮各弁掛欠正額頗多追比遽難完足若益以附餘之數則逋欠更夥終爲不結之局與其徒加虛數而積負無寧實催全完之爲愈也合無將各船水兌米應否仍加附餘其進倉之米旣經晒揚似宜寬政至于上倉脚價先經詳議每石給錢八文俱是運官自備此有通庫潛規舊例非本道所敢附贅也伏惟本部院裁酌咨部定奪等因到部院

據此看得津門今歲收受漕糧本部院因鑒往
弊立法矯而更新每船擇其乾潔者先以六分
水兌海運原未晒揚其餘四分米色稍次驗入
乾潔此皆貯倉候運之需歷時半載有餘誠恐
復蹈凍糧之轍勢不得不加晒揚始行收受入
版計米一十九萬八千八百六十一石四斗零
其虧折之數每石誠不止於五升也夫旣晒揚
矣而復虧折矣則附餘之名目恐亦難以更立
者而安得不稱賠苦耶應否豁免自在戶部主

持至於上倉脚價向止搬運河北倉廩每石
錢不過一二文原係運官自備今以邊氛未靖
積貯宜週責令運入南倉已經餉道議定每石
脚價八文仍令運官照例自備車運訖各弁比
照京適各鎮之例欲請銷算此係漕規津門不
敢妄爲議擬若夫官旗苦累軫恤同心派裝
四六均分共沾水兌之利需索則嚴加禁革更
絕旁費之端津門所以體恤者固已曲盡之矣
此外或應作何調停戶部自有裁酌非本部院

所可越俎也既經該道廳查明前來擬合咨覆
爲此合咨酌奪等因到部奉批據咨津門原截
漕糧共計五十四萬四千八百五十四石零除
掛欠米五萬七千二百二十四石四斗零實收
米四十八萬七千六百二十九石零每船四六
分派共六分水兌過米二十八萬八千七百六
十八石零四分入倉米一十九萬八千八百六
十一石四斗零是從來掛欠之多未有如今年
之甚者也若附餘米每石五升不知原算入截

漕之內乎抑仍在截漕之外乎如或在外則所
掛欠又當以二三萬計矣附餘米卽免晒揚米
此從來所有不自今日始也且水兌之米原未
晒揚似難免其附餘入倉之米旣經晒揚且有
賠費腳價每石八文則附餘一項自當量行酌
減矣總之各弁貪肆無忌而津門兵管二廳亦
味代爲乞憐求免但恐作法于涼則後將靡所
底止矣仍移咨督部查議奉此復又呈堂咨行
督部備查截津漕糧五升餘米是否截數之內

或在截漕之外除水兌不免外其入倉米一十
九萬八千八百六十一石零既經晒揚又有脚
價之費餘米作何酌減從長議妥去後又奉本
部議准督部咨爲嚴追掛欠漕糧事內稱察照
截津掛欠從無復補之例咨內已查之詳矣况
節年帶運虧漕實多如再欲以欠數取盈於漕
則漕欠將問之水濱平等因到部奉批雲南司
查議奉此又該本司說堂津門所截糧米除水
兌外其入倉者晒揚米應否准免若干伏候批

示緣錄奉批津門掛欠米數太多欲求補截呼籲不已從前原無此例但查往年晒揚餘米原不作入正數之內今當查明崇禎四年截漕若干內有晒揚餘米若干准其補截其餘止以本幫扣留簞羹給發買米足矣決不能再補也截漕四六分派其六分水兌者原未晒揚則附餘米五升無可減矣惟四分入倉者既經晒揚且有墊出入倉腳價姑免附餘准作通免宜照此例銷算速行通糧廳知會奉此查得崇禎四年

截留津米共計五十四萬四千八百五十四石
有奇除各衛所掛欠米五萬七千二百二十四
石四斗零實收過米四十八萬七千六百二十
九石零內有附餘米二萬四千三百八十一石
四斗零原不應收入正數之內而去年作截漕
正額今計各弁掛欠五萬七千二百二十四石
四斗零則原截附餘之米強半托之空談海運
大事豈容漫置不問自不得不於新漕內照數
補截者也但津門截留漕米四六分派其六分

水兌者原未晒揚則附餘米必無減損之理其
計該追附餘米一萬四千四百三十八石四斗
零其四分入倉者既費腳價且經晒揚則附餘
當在寬免之例共計該免附餘米九千九百四
十三石零斯亦揆之情理當如是也此外再益
以本幫簞羨等銀給津買米其不足者應聽津
門追比以足海運之額相應題明以便遵照案
呈到部該臣等看得截津漕米原供海運爲關
寧兵餉之需計兵授食無容短少今崇禎四年

分截留津米五十四萬四千八百五十四石有
奇乃掛欠至五萬七千二百二十餘石不爲不
多矣津撫恐虧海運是以有截補之請然掛欠
原在各弁自應於各弁追比倘必取盈於漕則
漕欠終成逝波而京通額需益爲補欠所耗

國儲何時裕乎但查掛欠數內有附餘一項在焉
其附餘之米先經臣部題明以截津米較入京
通者便益殊多且米未晒揚每石除尖耗外議
加五升以補虧折原不爲過但此項原不在正

額內而今以作截津正數則掛欠之多亦繇於此夫各幫漕糧原不能全完卽京通諸倉皆然而何獨取盈津門以坐誤軍餉今議除去附餘不作截津正額則二萬四千三百八十一石四斗零誠不得不於新漕內照數補截者也又津門實收漕米內水兌二十八萬八千七百六十八石零永經晒揚則附餘之米自難妄與豁免其入倉一十九萬八千八百六十一石零業經如法晒揚復又自備腳價入倉則附餘米九千

九百四十三石零掄之情理委難再追應著爲
例以便遵守查掛欠米共五萬七千二百餘石
除補還二萬四千三百餘石仍欠三萬二千九
百餘石內有應追附餘一萬四千四百餘石亦
可抵其少半蓋附餘一項雖不可作正截之數
亦可補正截不足之數此外再以本幫匱羨等
銀勒令通廳銷算照數給津買米備運加以盡
法追比則所欠視往歲亦不甚相懸矣以後津
門截漕之始卽當設法稽查加意追比務求足

額若索之累月經年之後則難圖也此又臣部
所惓惓厚望于津撫道廳諸臣者也既經該司

案呈前來相應題

請恭候

命下臣部行文各該衙門一體欽遵施行

崇禎五年二月十九日具

題本月二十三日奉

聖旨查叅津糧掛欠五萬七千有奇明係截漕正額
若附餘一項既應除免初時何故算入額內本內

尚未說明併簞羨等銀數目若干舊欠追比實應
若干俱未見開列詳晰還着另本確奏來行欽此

覆總督倉場條陳漕政利弊疏

題爲漕政之壘壞多端本計之防維宜亟謹欵祈
利弊懇祈

嚴飭以裕軍儲以維

國脉事雲南清吏司案呈崇禎五年正月初七日
奉本部送戶科抄出總督倉場尚書錢春題前
事內條議漕政緊要事宜十欵謹請

勅部議覆緣繇正月初四日奉

聖旨漕政積弊這條列諸欵深於釐節有裨着該部

逐款議覆飭行併運弁侵逃應究追的着勒限
提追比不得徇縱欽此欽遵抄出到部送司卷查
崇禎四年十月二十三日奉本部送戶科抄出
總督倉場尚書錢春題爲遵

旨查明具奏事內稱臣因奉

旨查漕糧之數而深慮漕額之出浮于入也計帶運
遼糧原額該四十五萬石今因灑派各省直不
敷實止帶運四十二萬一千四百五十四石
十五升零至鮮糧十萬石卽於舊額四百萬石

內撥運原無編派是入數先虧於額內矣計撥
運邊糧原額止四十餘萬石今另截留津鮮糧
四十七萬五千八百九十八石六斗零截留薊
永糧一十五萬石是出數更溢於額外矣以邊
糧之四十餘萬補截留之六十餘萬一歲之間
已透用京通糧二十餘萬况遼米撥納京通例
無尖耗今移彼補此名雖相抵實未相當既有
明虧復有暗耗無恠儲庾之日就空虛也以有
限之帶運當歲益之邊需已往者有借無還將

來者有加無已而一切支放亦未免濫觴溢額
京儲豈不涸之源而得不商可繼可久之策也
哉等因十月二十日奉

聖旨國計首重積儲其次亦量入爲出據奏帶運有
限截留改撥歲有增加若不酌定久計緩急何賴
至支放濫觴尤當釐節該部卽悉心條議詳確具
奏欽此欽遵抄出到部送司隨卽呈堂咨行督撫
商酌妥確條議回

奏去後今督部所議款內如禁革冗員增放折色

嚴追掛欠諸款于出入大較之內竊釐革節省
之意其有裨積儲匪渺小也相應一併議覆案
呈到部該臣等看得漕糧四百萬石原額止有
此數內永折三十二萬七千四百餘石且帶運
遼糧額該四十五萬石以正糧十石始帶運一
石五斗總而計之實止帶運四十一萬五千九
百八十石視之額數已虧漕三萬四千餘石而鮮
糧十萬石又取給于漕額之中也近該臣部於
五年預計召買疏內題明于鮮糧十萬中撥補

三萬四千九十二石以足帶運之額惟是截留
改撥皆邊餉之急需臣部萬不容已俱經先後
題

請戍兵既有增加則需餉難拘舊額支放逾常職此
故耳但倉庾原非不涸之源則出入宜有一成
之額督臣憂深

國計先有遵

旨查明具奏一疏業奉

明綸令臣部悉心條議臣等方欲商確酌定以圖經

久仰副

聖明霄旰之憂正擬疏具覆間而督臣復列款上

請所爲量出入之數塞冗濫之源嚴追比之法皆關
漕事而着允於釐節有裨臣等竊有同心謹遵
奉

明旨逐款議覆臚列覆

請伏候

睿覽裁奪施行

計開

一 包代侵尅之宜杜該臣等看得運船旗
甲須選殷實名名見在而行月糧銀亦
須從公給散乃絕弊竇比歲運官包旗
甲旗甲亦包旗甲且把總與運官委官
通同綰結居行月糧爲奇貨一味侵肥
此胡可不亟爲禁戢也至於運軍扣解
三月防欠糧銀正恐窮旗掛欠一時無
從措處俾比追者得以扣抵而完糧者
照數給發實激勸之大典而終事之微

權也近多隱匿乾沒以致欠者無抵完
者無給蠹莫甚焉先經臣部於銷算規
則內責成糧道帶解奉有

俞旨今督臣鑒百戶陳百齡等侵費再爲申飭所當
嚴責各該糧道於開幫後卽選廉能委
官押解抵通暫寄通庫一面申報臣部
督部俟納糧完日通廳會同糧道完者
照數唱給欠者照數扣存仍報臣部督
部查考其把總運官有玩忽不遵及通

同乾沒者聽督臣查實指名叅處庶人心知警而弊端自消誠大有裨於漕政者也伏候

聖裁

一印運更番之宜定該臣等看得掌印領
運更番而任

明例也夤脫弊入分途而趨積弊也惟運官不肖則
倍尅折賣之病甘蹈而不顧欲其振刷
釐剔勢必不能矣是運官之匪人實漕

政之大蠹也。督臣欲請重加申飭移會
南京兵部及各省撫按糧儲兵備等官
務照舊例揀選先掌印而後領運糧完
復回衛掌印庶有才守者得以表見而
無賴藉者不復鑽營漕政之情竅從茲
其一新矣伏候

聖裁

一嚴保認以防隱脫該臣等看得年來運
官受累於監追者雖其自爲不肖亦多

錄於奸猾旗軍欠糧棄船而逃也究其
脫逃之故特以狡黠之徒無身家可戀
耳若徒嚴法以禁其逃不若加意以慎
其選督臣請行各衙門僉派旗甲富饒
者不令營免無賴者不許包充最爲喫
緊關頭但使旗甲得人一意急公運官
無常例之索交兌無折乾之弊抵壘完
糧直剩事耳再行編伍互結連坐之法
以約其前復申調衛嘹哨嚴峻之令以

繩其後其有欠糧而逃者鮮矣若揀選
不精踵襲前弊原選官叅論罰治此亦
釐奸完糧之要道也伏候

聖裁

一別完欠以蘇連累該臣等看得官旗領
運法必賞完罰欠而人始樂於輸納若
旗軍完欠無別則人何利於完而完者
亦欠矣今督臣設有覈冊以稽旗軍之
完欠其無欠旗軍另給完照通行各該

撫按知會所在有司但查給有完照者
不許衛官捏欠詐害其不完旗軍與運
官留京一體叅送比追則因完欠以定
功罪人心自將感激而思奮矣伏候

聖裁

一歲增冗蠹之宜禁該臣等看得每歲漕
糧四百萬石除改折及改撥邊糧截留
津糧外其入京通倉者大約不滿三百
萬而支發逾常出倍於入欲求倉廩不

祖

制漸復而漏卮可塞矣伏候

聖裁

匱豈可得哉督臣議請嚴行各該衙門
但查萬曆年間伍籍數目立爲經制且
係以後新增必萬不容已者方准存留
餘皆汰除以明節約則

一扣給懲勸之宜明該臣等看得官旗完
糧之後例有應給蠶桑等銀以示優恤
而明獎勵若完者代欠者扣抵孰不鉅

腕而灰任事之心欠者賴完者賠償將
赴波累而長貪黷之膽除胡國勲等不
准白借桑日新等完糧銀項外近日臣
部於逋糧正在截叅疏內題明以後運
事初竣京通二廳速將運弁完欠銷算
通詳其糧完無欠各幫督臣覆覈清楚
先將完糧職名及應給銀數開列咨部
卽速給發毋少遲延無論完者益知自
勵自當黽勉爲善卽奸猾逋欠者亦知

不能以人之羸蓋已之縮惟有俛首以就囹圄亦將有所懲創而不敢恣意折賣矣伏候

聖裁

一禁別差以杜巧卸該臣等看得衛官領還原有專責卽親身在船猶虞其疎而防其情若使復營別差則官何以運名運何以官爲在運弁旣得恣其躲閃在旗甲亦復任其侵沒大非設官之初意

矣今歲督臣查有陳安國等三員管謀
別差以致欠糧獨多除另行查叅及嚴
提正身追究外覆轍在前殷鑒不遠嗣
後通行各該漕運衙門凡係領運衙官
不許別營差委如故違者管差衙門與
差委衙門一併指名叅處則奸心自塞
而弊竇潛消矣伏候

聖裁

一停協運以專責成該臣等看得京通漕

務諸司設立各有責成客歲督臣出巡
深慮獨拍無聲議設協運主事差程世
培以往及後抵通在各差既有越俎之
嫌在世培亦有侵官之懼無所事事竟
成贅旒此後但得諸司敏辦供職何協
運之不可停也總在因時制宜無取膠
柱鼓瑟云耳伏候

聖裁

一增放折色以裕公儲該臣等看得舊例

京通官軍每歲放折色兩月良以庫銀
倉米總屬

公家所以權本折而通盈縮也昔年因災改折亦
曾放至四閱月今督臣比照舊例請增
放折色爲慮誠遠但查省直漕折歲止
二十二萬有奇月支折色必需十二萬
兩上下不足則取給於運官米折并輕
賚銀兩而輕賚一項除漕運正用外若
不那爲新舊二餉之用亦足供米折一

月之需然多放一月之折色便貯存京
庾二十四五萬之本色通計十年可餘
米二百五十餘萬則十年而餘一年之
食矣今截漕漸多入不敷出臣與督臣
面商今日非多放折色無以救本色之
匱所當亟爲舉行者也合無自崇禎五
年爲始每歲放折三月加意酌濟至於
運弁積逋臣部題催咨催不啻再四業
已奉有

嚴旨在外撫按諸臣孰無急公之心寧忍秦越以相
視耶帶徵宿通用佐空乏此又臣部所
厚望於各省直撫按諸臣者也伏候

聖裁

一揆放斛掣以釐私弊該臣等看得新陳
相因乃倉政良法輕重在手實倉役陋
規查京通各倉管衛有棟廩之弊官攢
有管壓之弊今督臣與總理內臣會議
一惟揆陳公掣卽零廩亦歸併聽掣則

二弊自肅然一清矣至於月放軍糧通倉斛掣京倉袋準雖以遲速分疎密而袋準者終不如斛掣者之爲確也督臣議令京倉亦照通倉一例斛掣日減其數月寬其期無浮出以耗

國帑亦無齎出以傷軍心則公私出入各得其平矣伏候

聖裁

崇禎五年二月十九日具

題本月二十二日奉

聖旨這條覆各款有裨漕政依議着實飭行還移會
總理衙門知道欽此

題報山東河南漕糧抵通疏

題爲恭報漕糧押運抵通事雲南清吏司案呈崇
禎五年二月二十一日奉本部送據山東督糧
道楊作楫呈稱崇禎四年分山東原額漕糧三
十萬五千六百石坐派淮安等十六衛所官旗
船隻領運本道遵奉

明旨于去年十二月內督兌全完卽于本月二十六
日起程登舟啣尾督押各衛官旗船糧敲水擊
凍前進除天津倉上納六萬石督押已抵該倉

薊州倉上納二萬七百石係濟寧衛前幫領運
督催業已轉津徑抵海口赴倉外其京通冒密
糧二十二萬四千九百石係淮安等衛所運抵
通壩交卸剝運本道首催淮安大河揚州通州
鹽城泗州高郵等七衛所糧船于本年二月初
六日先已抵通呈報訖其東昌任城武平徐州
徐州左濟寧後幫鳳陽留守等衛船糧本道星
夜督催俱于本月十六七等日鱗次抵通是後
也其迅速爲從來僅有爲天下首倡卽脈絡指

据心力俱殫亦臣子急公之分宜然何敢言勞
忽奉兵部劄付調本道萊州分守海右道監軍
祇承

欽命當萊州戎馬倥傯之日又當竭蹶趲赴不敢稍
緩輸輓之責方完軍旅之寄又至例應回赴新
任料理兵事擬合呈報又于本年二月二十二
日奉本部送據河南督糧道游王廷呈稱崇禎
五年起運四年分漕糧正耗共米三十八萬二
千七百九石二斗六升臨清等十七衛所淺剝

船共九百七隻本道遵

旨尾運矢竭大馬力爲挽速之圖伏覲

欽限以三月上旬爲期兢兢恐後自四年十月二十

一日前幫開幫以來至十一月二十日守凍十

二月初十日擊冰前進單騎往來沿河督令飛

輓自臨清達德州於五年正月十五日抵津門

而天津以北并河西務上下遇有淺澁多方挽

拽設法剝運口年並作宵旦靡寧臨清衛前幫

於二月初六日首抵通壩令通州等衛於本月

十一日俱已抵遼其餘各衛所糧船陸續已過
張灣二十日啣尾而抵通壩運務告竣例應回
任擬合呈報等因到部俱奉批雲南司速行查
明具題奉此相應具題案呈到部該臣等會同
總督倉場尚書錢春看得山東河南漕糧定限
十一月中徵收全完十二月內兌完開幫三月
內抵通完糧先經臣部題奉

欽依通行在案今據山東道臣楊作楫河南道臣游
王廷各報鱗次抵通臣等查與單例程限不違

迅速如此似亦近日所僅見者也至於南直江浙湖廣等處亦已多報開幫繇此而觀則全漕四百萬石可源源而登大庾竝見倉箱有因陳之積矣謹據實入

告以慰

聖懷惟是開壩工程聞工部約以二月終報竣而澆開泄水又須兼旬今當先行祭壩剝運邊糧次及通糧責成通州司屬早爲料理庶不至於廢時而誤事矣至於山東河南糧道楊作楫將王

廷恪遵

欽限銳意灌輸此其急公之念拮据之勞臣等不敢
不爲拈出上

聞以風在漕諸司者也既經該道呈報前來相應題
請恭候

命下臣部行文各該衙門欽奉施行

崇禎五年二月二十九日具

題三月初三日奉

聖旨山東河南糧已全到知道了楊作楫游王廷亦

見恪職閘壩工程着該部嚴督經管司官速圖竣
役不許草率塞責其祭壩剝運事宜依議飭行欽

此

題通糧廳開河挑濬已竣疏

題爲開河挑濬已竣謹據實恭報以候查勘事雲
南清吏司案呈奉本部送據管理坐糧廳署郎
中事主事今降一級劉夢桂呈爲河工已完節
省實多懇祈遵

旨查明速賜題覆事內稱竊照開河每歲小修費不
過三百金然止就開座之鴈翅金門稍加塗飾
備石灰葺草椿木之費至于堤岸坍塌河身淺
阻寬不實力比及糧運盛行多所阻滯督部有

鑒于此因力請大脩謂工部見在修閘欲以夫
匠物料之便併工以圖爲一勞永逸之計豈估
勘既定而馮郎中以脩閘爲辭堅不肯任職慮
彼此遜謝將悞運可虞遂不避越俎勉分其勞
初亦謂錢糧措自本部可力求節省而夫役旣
責水脚又督促較便不意勞甫欲分而過卽隨
之緣都水司之案呈不明致與馮敬舒並行議
處鑄級示懲猶幸

聖明自有鑒裁容職河工完日查明奏奪是職前罪

漸有分豁而後効堪以圖補自前月二十四日
破土興工日夕往來身親督率今月十八日一
切工程俱已報竣是役也以言乎工程有工部
原估應修而今報罷者有工部原估不脩而今
議興者如八里橋東西兩淺原佑長共六十一
丈濶共八丈深各七尺工價議定一百四十二
兩職往勘之當此洩水澆閘之時水尚盈尺且
上年白剝倍載不聞淺阻是不可以已乎如慶
豐閘之下水南北剝岸原議挑挖共長二十丈

共濶二丈八尺共深九丈三尺今浮土盡取填
閘座無可挑挖尚復混開以冒工價乎如官廳
門首之幫培長六丈濶一丈高八尺如石壩之
上糧河岸補濶一丈長四十二丈高八尺胥船
頭緯道所經抗頭堆米所切各役合力願脩實
未支領工價敢復混冒以滋多費乎若夫石壩
之黃家墳東北岸下淺船身轉關往苦楸澁普
濟之南岸西長身壩東西缺口共七十餘丈亦
滿多冲緯路偏窄二項工部原估俱未開載是

可不急爲挑挖急爲幫築乎總之可已則已不敢踵襲原冊以開冒濫當脩卽脩亦不敢株拘舊估以貽後累究竟議已者不如議脩者之多也至於各閘有攔水壩月河壩與夫放水堤口此時閘工未完不敢開築應俟工部舖商另日補脩者也而職應脩之工程畢矣以言乎夫匠職見脩工者每日查點小夫稽考匠作精神非不嚴密而工程竟無實效職惟責成于各閘水脚與軍白糧經紀每段插一某字某號某人木

椿于其界既畫地以分之又刻日以程之其所
用夫匠名數則以親勘做過之丈尺爲準是以
計日告竣而更不得潦草苟且也以言乎錢糧
之費除椿木缺角磚照原估數取足于工部止
買葦草二千五百觔用銀四兩二錢五分爲黃
家墳築堤口之用再買塊灰二千八百斤用銀
三兩五錢爲大通橋砌剝岸之用其餘夫匠工
價俱照工部原估而裁其半匠作每日三分小
夫每日二分今工完總筭共用物料夫匠銀四

百三十六兩五錢五分視往年小脩例僅多一百餘兩較工部原估一千一百三十餘兩幾省三分之二卽較都水司裁減之八百一十九兩又已裁其半此中之節省不旣多乎然而或挑或築俱着實堅深毫無苟且本月初九日已經督部總理親臨按驗目中已自了然工竣費省職之降級原以河工之故則職之開復亦應在工完之日等因到部奉批據呈閘河挑濬已完卽移咨督部再一查明以便具題奉此隨即呈

堂咨行督部查明去後今奉本部送准督部回
咨內稱看得大凡興作俱屬之工與戶無涉惟
是閘河一役議始本部而工部以爲脩五閘濬
外河又復加以閘河之工通惠一司官豈能分
身四應而遂暫以坐糧廳分任之非制也幸耶
中劉夢桂饒有心計善於鼓舞夙夜拮据毫釐
盤筭而又得各水脚感平日養之恩效一時
乎來之誼餽不取其稱事敏務竭其四股計興
工以暨告成不滿一月本部同總理在通州查

放軍糧曾過而閼之見堤岸增高加濶而河身
已無突兀欹欹之處矣再查工部之原估省費
可三之二卽照減削之數亦得節縮其半夫每
歲小脩尚及三百金而此亦大舉也乃催加一
百三十餘金而能使四十里之長蛇蜒如虹水
流湯湯則本官之束修自勵而能勤勞於

國事亦可知矣再照本官近以工部閫工亦蒙鑄
級但論事理則通惠與坐糧極其相關而論職
掌則戶司錢糧工司興作終當有別而論權宜

則此爲開河彼爲開工亦較然不容混也

明旨工完奏奪而今分任之工則已完矣相應據實
咨覆煩爲題奏施行等因到部送司卷查先准
吏部咨爲一年漕白二運通完覆核已確恭報
以慰

聖心并告成事事內稱該本部題前事看得脩開
河戶部發錢糧工部鳩辦工料既奉有嚴駁
互稽之

君命儼然同體之中寧宜異視况河道糧運寔相關
切惜陰共事何分彼此若劉夢桂者姑拈水脚
一項初欲歸併僉商仲冬以前寔多觀望難盡
卸責于馮敬舒也或曰薄乎云爾應量鑄其級
以示薄懲謹遵

旨覈議上

請恭候

命下將劉夢桂降一級照舊管事等因奉

聖旨劉夢桂着降一級照舊管事俟河工完日查勘

奏奪欽此欽遵備咨到部送司在案今據郎中劉
夢桂呈報河工告竣相應具題

請奪案呈到部該臣等會同總督倉場錢春看得工
程之遲速在計其時錢糧之省費在核其數若
考成之殿最又必分明其職守如坐糧廳郎中
劉夢桂因工部脩閘工遲吏部併議降級業奉
明旨河工完日查勘奏奪今據劉夢桂具文報竣
夫夢桂之分任河工也良以河閘原屬一事工
部併力脩閘猶懼後時再加河工必至悞遲矣

非

公家急務不欲以戶工分彼此亦同舟共濟之一
念也今查工興於正月二十四日報完於二月
十八日前後僅二十餘日工亦爲速總計用過
工料共銀四百三十六兩五錢五分較之工部
原估用銀三分之一較之工部裁減之八百一
十九兩用止一半費亦爲省况經督臣總理查
驗已明則夏桂之任是役也可謂竭蹶從事矣
前奉有工完奏奪之

旨謹將鳩工起止日期并用過銀數據實以

聞至于原降一級應俟工部間工完日一併查勘奏
請取自

聖裁者也既經該廳呈報前來相應題

請恭候

命下臣部遵奉施行

崇禎五年三月初三日具

題本月初九日奉

聖旨劉夢桂還俟間工完日一併查覈具奏欽此

覆總漕題衛官藐法誤運疏

題爲衛官藐法誤運乞

聖明乾斷風行以速漕務事雲南清吏司案呈崇禎
五年二月初十日奉本部送戶科抄出總漕部
院李待問題前事內稱崇禎四年三月十四日
准戶部咨雲南清吏司案呈奉本部送戶科抄
出江西監允主事吳澧題叅沔陽衛運官張應
斗人船未到武昌左衛運官張明錦等十二月
終旬到次皆違誤限期湖廣運糧把總文移金

不相聞廣信所千戶胡龍吟臨運脫逃督造官
劉京新船未完各緣繇題奉

聖旨漕運無誤全在開兌如期乃張應斗屢撥不至
旗船金稽本當提究姑着降二級戴罪領運張明
錦等違期缺船念已開幫也着戴罪通俟運完奏
奪胡龍吟臨運潛逃尤屬非法着李待問嚴提究
擬湖廣運總暨督造劉京并議罰治具奏該部知
道欽此欽遵抄出到部備咨到臣准此隨經飭行
江西湖廣各糧儲道查照究擬罰治去後又經

節次行催至本年十二月初五日據湖廣帶管糧道右布政馮任將湖廣運糧把總黃河恭具繇回報到臣本月二十七日據江西糧儲道右叅政汪元功將廣信所千戶胡龍吟百戶劉京各具招詳前來該臣隨將各招詳併行漕運理刑刑部主事徐應龍叅酌情節序明彙招覆詳到臣內開一問得一名胡龍吟年三十歲係江西廣信所正千戶狀招龍吟于崇禎二年間蒙漕運衙門單委隨幫運糧與同不在官領運千

尸周可久幫貼完運訖至崇禎三年可久年老
患病具告休致蒙府行委不在官百戶陸三德
護印比三德見龍吟回所將印務具呈改委蒙
府申詳未示間龍吟屢赴本府控辭不合故違
議單內一欵衛所應運官員有奸懶托病不赴
運者指揮降三級衛鎮撫千戶降二級所鎮撫
百戶降一級仍發運等因事例竟自躲避去訖
本府隨提家屬急令追趕無踪查有本所不在
官千戶桑日新已經回所改委隨運呈詳本省

撫按兩院批允蒙府催伊開幫去訖比有本所
額船五十一隻俱被虜燬奉文補造當該本府
詳委本所在官百戶劉京管造比伊亦不合漫
不經心聽信旗軍共先造船二十一隻仍止造
完九隻其餘一十二隻尚未完工不能裝載因
運期急迫只得將本所糧米洒派南昌等衛帶
運去訖先蒙本省撫按兩院將劉京題奉

欽依降職二級欽遵間又有沔陽衛不在官運官張
應斗武昌左衛不在官運官張明錦到次愆期

有不在官湖廣運糧把總黃河恭不行催督任
張應斗等延玩續蒙江西監兌吳主事將沔陽
等衛運官張應斗等并湖廣運糧把總黃河恭
及廣信所千戶胡龍吟百戶劉京避運違誤緣
繇題奉

欽依下部隨蒙戶部咨稱煩將胡龍吟嚴加究擬仍
將湖廣運總暨督造劉京遲玩情繇一併確酌
速議罰治徑自奏

奉等因備咨總督漕撫李部院當行湖廣江西督運

道究擬罰治去後又經節次催蒙湖廣帶管糧
道馮右布政使呈據黃河泰申稱張明錦船三
十六隻張應斗船十五隻俱于二月中旬開行
于三月初旬至鱗魚嘴復載三月盡數過淮漕
撫院道卷案可據今糧抵壩金無違限等因據
此切照黃河泰今得回省正在料理新運援例
乞寬但

明旨森嚴罪之輕重非本道所得輕議等因又蒙江
西糧道汪右叅政行府拘提龍吟劉京詳審間

龍吟訴稱原雖詳委尚未批示所印未接錢糧
未領等情赴府訴准各另具招呈詳蒙汪右叅
政先將龍吟一案覆看得事不避難臣之職也
押運乃武弁事疇敢辭難而胡龍吟堅欲辭之
耶亦應辭於該府未詳之先豈已坐名申請而
猶悍然抗避也設各弁人人如是不其誤運限
而漕事幾頓矣議單降級成例昭然一校豈足
蔽辜仍重降二級補運一年以信漕法又蒙將
劉京一案覆看得運務需船甚急劉京既承委

督造卽應一二報完乃額該五十一隻而造僅
二十一隻已不及半又內止完九隻其十二隻
者仍付之無何有之鄉若非南昌各衛所代爲
灑帶誤運之罪何可勝道也已奉

旨降級仍引例杖究各等因招詳漕撫部院隨蒙李
部院憲牌仰漕運理刑司卽將發去抄錄原咨
并湖廣江西糧道招詳情繇總彙一招擬議妥
確把總黃河泰一併酌量擬罰招詳庶可速回
欽件無得遲誤等因隨該本司徐主事遵閱原咨所

叅各弁情節及兩道招詳情繇覆覈明白除張
應斗身故及張明錦等應候戶部查覆外看得
廣信所千戶胡龍吟妄運漕糧分當竭蹶恐後
惟知貧窶遂爾匿跡不前劉京董造漕船僅完
九隻遲造甚多幾誤公事均於律例有違擬林
降級似足蔽辜至黃河泰既有總運之責自合
急行催督乃任張應斗等到次愆期雖未誤運
然而怠緩之責或亦難辭亦應量擬罰俸以示
懲儆將龍吟等取問罪犯一員劉京年六十歲

係廣信所百戶招同一議得胡龍吟劉京各所
犯合依凡奉

制書有所施行而違者律各杖一百有

大誥及遇蒙

欽恤恩例通減二等各杖八十俱官審俱有力各照
例納米價贖罪完日各降職二級胡龍吟仍補
運一年黃河泰罰俸半年俱戴罪管事伏候詳
示奉行一照出胡龍吟劉京各官紙銀二錢并
各贖罪米八石每石折銀五錢各該銀四兩并

黃河恭罰俸半年俱行各省糧道將各紙罪罰
俸銀兩追貯各府官庫彙解支銷取實收繳報
餘無照各招繇到臣該臣看得胡龍吟身膺世
職避運辭艱已蹈奸懶之條難道降罰之例仍
應補運以贖前愆劉京承委督造漫不急公後
雖補造全完揆時業已坐誤題叅降級未足盡
辜二升均應杖懲以申漕法黃河恭專司總運
坐視愆期怠玩自無可辭罰治庶足示警既經
司道覆勘前來相應具題伏乞

勅下該部覆議上

請行臣遵奉施行等因崇禎五年二月初六日奉

聖旨該部知道欽此欽遵抄出到部送司查得張應
斗先已病故無庸再議張明錦等俟督部截叅
另議外所有胡龍吟臨運脫逃劉京造船未完
并黃河泰督催愆期俱經總漕臣議擬具奏奉
旨下部相應具覆等因案呈到部該臣等看得漕政
整飭方新大小臣工毘勉從事宜何如謹原者
如領運隨幫恪有程限而千戶胡龍吟業經詳

委何得抗避不前督造船隻尤係急需而百戶
劉京身董其事豈容任意延緩照例各降二級
仍應擬杖示懲至于把總黃河泰職任總司自
當按期催督乃官旗到次踰限而文移並不相
聞職任謂何姑念見今料理新運量從罰俸半
年以觀後効既經總漕等衙門確擬前來臣等
覆核無異相應題

請恭候

命下臣部行令欽遵發落施行

崇禎五年三月初四日具

題本月二十五日奉

聖旨俱依議欽此

覆余漕院條議漕儲運道防護事宜疏

題爲漕儲關係甚重運道防護宜周懇乞

聖明嚴飭以保萬全事雲南清吏司案呈崇禎五年
三月初四日亥時奉本部送准戶科封出

紅本該巡漕御史余城題前事內稱就漕防漕爰有
數款敢爲我

皇上陳之一官兵防守漕河一路隨處設有兵勇統
以將領材官以之護漕防患原其職掌今宜責
令該將官率領兵士隨帶鋒利器械各分信地

布列河干或於要會處所設立營壘無事則巡
行護送有事則互相聲援其一切調遣統馭機
宜悉聽總河督臣隨所轄屬而斟酌布之庶沿
途不患無兵此亦護運之急著也一兵壯接護
近河各州縣衙門原有額設民壯兵快非僅以
供奔走之役也譏察守禦總不離此輩近是令
令各該有司查有兵壯若干半爲護城半以衛
漕擇委一廉幹職官派定信地督領防運如遇
白漕二船入境各持兵器護送出信交割前途

兵壯方回復送周而復始往來絡繹如遇逃賊
併力擒勦脫有疎虞罰無貸不但此也推而廣
之各府州縣俱當亟行編派保甲團練鄉兵之
法蓋衆志成城何寇賊之不克互相覺察何奸
宄之可容果能銷亂萌於肘腋拒兇逆於千里
而漕河亦自無意外之虞者此似緩實急之一
義惟在各有司之善行之也一聯絡幫次漕運
之制每船額有軍旗每幫領以材官則千百之
將十萬之衆隱然成一千城之勢寓兵於漕此

爲最善今歲兌運頗蚤萬艘雲屯河南山東將抵津務江北如限續發浙直江廣亦皆先期鱗集閘口需次僨進而過閘以後一或借口觀望濡滯莫前則多艘不相接續未免衆而示之以寡豈便計乎臣徧檄印河有司及掌印衛官各在境上沿途催僨挨序前往不許一船殿後查有脫幫卽將該管印河官叅處庶運務得速而積衆爲強亦可潛消窺伺之奸矣一預備器械戎器不除無以戒不虞先年議置刀鎗銃炮弓

矢等器付之運船旗軍隨隙練習誠重之也自承平日久而兵器化爲烏有且并軍丁而非矣臣卽徧行各把總責令各幫官隨船補足乃錢糧無從措辦終是畫餅若責成各省分備則西江之水遠不及濟是在漕河督臣作何設處置造每船暫給弓矢等項一二件俾真正軍旗領用其所募外水皆烏合之徒但令多備干橈以資捍禦如是則利器既不輕假而防運得以藉資庶不至以徒手爲却步矣一酌量移鎮東南

漕艘以淮安爲要會重運河道以濟寧爲要會
兩重臣之設凡以爲漕耳往歲漕運過淮過洪
之後總漕督臣或移駐宿遷以彈壓官旗總河
督臣或移駐張秋以料理輸輓蓋撫則宜取坐
鎮而巡則不妨遊行今者逃難之衆紛紛南下
湖河一帶奸宄叢生糧艘之出淮者惴惴然有
戒心臣謂濟以南漕撫臣當力任之必將此數
千重艘交付總河督臣而後可以晏然非臣之
過爲計也重運自過淮以後不四五十里卽將

溯黃河而上所過清河桃源皆水災疲地饒民
時聚河干孰焉可虞及踰黃抵宿遷縣經陳窪
溝入運河此處接連山東郟城縣山僻人稀去
登州無甚阻隔又委迤河濱必經嶧滕界上方
達沛縣夏鎮等開而鄒滕魚臺嶧縣之間爲蓮
妖捶手淵藪沛鎮居其中央往往爲奸宄所睥
睨此淮徐道轄屬而亦漕撫臣所統馭之區也
卽沿途設有兵將原自不多何以禦不測之寇
督臣擁兵衛運建威銷萌直抵南陽關以下交

與河臣接護而後回鎮庶一半危險可以無虞
如曰登州賊壘可以直達淮之海州贛榆而高
郵寶應邵伯諸湖時有水寇出掠則有淮揚道
臣之嚴防在至軍行糧從兵貴以律又總漕督
臣自饒爲計之有不待臣詞之畢者如總河督
臣沿河皆其掌管布置兵將處處宜周統率駕
馭在在宜慎而東省震恐之地更當爲痾瘵切
身之圖一如漕臣之督兵防護直抵德州而天
津撫臣照信迎防則聲威振妖氛潛消漕運

萬全之計或亦不出於此在諸臣亟抒蓋猷自
不以臣言爲過望矣等因本月初四日奉

聖旨運務著漕河二臣嚴飭悉防已有屢旨這所奏
諸款該部確議速覆欽此欽遵到部送司查得巡
漕御史余瑛條議防漕五款奉

旨確議相應逐款具覆案呈到部該臣等看得漕糧
爲軍

國命脉事莫大焉方今叛賊猖獗於登萊逆氛騷
動於淮濟全漕震隣實爲可慮雖藉

皇上如天之福指日蕩定而思患預防誠不可不
爲桑土之謀也漕臣余城仰承

簡書職司漕務汲汲以防漕爲念議以原設防漕將
士分撥州縣兵壯畫信而守荷戈而送加之重
臣巡鎮於上糧艘聯絡於下共爲聲援互相犄
角無事則押送河干有事則并力響應自然動
獲萬全蠢茲逆賊又何慮哉辰下江南糧艘脚
尾而來正當萬分愁飭伏乞

嚴飭總漕總河并東撫津撫扼險均吭調度策備務

令我無可乘賊有所畏如有疎失法在必行庶
防禦周而飛輓速糧運可無虞矣恭奉

明旨着臣部議覆謹逐款臚列上

請伏候

聖明裁督

命下臣部通行遵奉施行

計開

一官兵防守該臣等看得漕河一帶道里
迂遠奸宄睥睨之隙頗多漕臣余玘議

令官兵防守誠桑土之謀也查漕河
臣向原撥有將領沿途押送第多視為
故事未免待玩今必責令分信防守無
事則逐程護送有事則互為聲援其臨
時統馭機宜悉聽總漕總河督臣計道
里遠近量兵數多寡酌形勢緩急相機
而應務出萬全仍擇衝要之區將領結
營而處不時督率兵士各帶利器接替
防護務使心志齊一號令精明萬一有

警此數千里漕河人人俱精勁之卒寸
寸盡戒嚴之地賊雖悍且狡氣自折而
謀自消矣伏候

聖裁

一兵壯接護該臣等看得漕河兩畔分屬
各州縣者卽爲各州縣信地防護之責
不容委卸當賊報孔棘之時隄防必須
嚴密值民力旣竭之日增兵又苦不能
漕臣余城議以各州縣兵壯半留守城

半分護運是兵不增而備可飭良爲有
見所當嚴行各該撫按遴選廉幹職官
督領分守信地凡遇漕白糧船入信則
送出信則返周而復始若遇賊則併力
擒勦論功陞賞有失則按法處分無少
寬貸庶警備具設人多悚惕矣且分而
言之不過一邑防一邑信地合而言之
則全漕皆在聯絡保護之中卽原設之
兵將亦可藉此而威聲益振又何懼竊

發之流賊乎至于編派保甲團練鄉兵
節經諸臣條議奉

旨舉行不啻再四自在督撫司道有司殫力奉行又
不待臣部之贅也伏候

聖裁

一聯絡幫次該臣等看得勢以合而大兵
以衆而強全漕數千餘艘一船十人總
而論之不減十萬之衆也以把總而統
指揮以指揮而統千百戶以千百戶而

統旗綱以旗綱而統外水如臂指之相
使宛然軍師伍兩也

祖

宗立法良有深意今卽以全漕之人而護全漕之船
豈不饒有餘力惟斷續不接則星散零
落是本衆而反示之以寡也旗軍萌覲
望之念奸宄啓垂涎之心良爲可慮漕
臣余城議令嚴飭所在管河有司衛官
催僸境內糧船務使逐幫相接首尾相
啣如有脫幫而運官不行督催該地方

掌印等官通同徇情延縱者聽漕臣查核叅處則漕船連亘河干一望千里不惟威聲大振可消窺伺之謀而啣尾催行併省侵盜之弊矣伏候

聖裁

一預備器械該臣等看得省直漕船舊例給有器械頃緣承平日久損壞者不復補造值茲多事徒有空拳何以責其禦賊哉漕臣余瑛議請預備器械誠有規

於赤手之不可以撻堅甲利兵也但慮
下船已抵淮一時錢糧無措難以猝辦
權令漕河督臣每船量給弓矢數副令
真正旗綱領用使人與器相習可備緩
急其餘外水止令自備堅壯干撻以資
器械之不足庶漕船得運軍以防護運
軍又得器械而益壯矣伏候

聖裁

一酌量移鎮該臣等看得漕運自東南以

抵西北綿亘數千里而遙特設總漕于
淮總河于濟蓋爲漕事誠繁且重也但
在承平之日卽坐鎮有餘值茲倥偬之
際似廵行爲急漕臣余城以總漕總河
二臣舊有移駐之例議令畫地分任良
以在淮者不能遠及濟在濟者不能遠
及津與其共治不若分治爲愈今議南
陽開以南俱總漕臣任之德州以南總
河臣任之而天津撫臣卽于德州接替

防護抵通計地不遠而用力亦易全漕
可望安堵矣若夫慮及郟城等處逼連
登鎮海州等處切近賊壘地方嚴防自
該道臣之事且漕河二臣饒有幹才何
難遙控無煩再計矣伏候

聖裁

崇禎五年三月初十日具

題本月十二日奉

聖旨這護運事宜河漕二臣移鎮津督監司接防分

地責成最爲要務其兵壯協力船隻聯幫原屬成
例著嚴飭行至人器須取相習但令各備使用器
械以資捍禦弓矢不必分給軍儲關係甚重在事
各官俱著悉心料理毋致疎虞欽此

覆應天撫屬漕糧完兌開幫疏

題爲恭報漕遼二糧恪遵

欽限畫數完兌開幫事雲南清吏司案呈崇禎五年
二月二十七日奉本部送戶科抄出應天巡撫
莊祖誨題前事內稱漕糧係軍

國重務饋運乃漕政要規況今邊疆多警庚癸頻
呼且奉

明旨森嚴必欲刻期竣事臣與總巡漕臣及兩按臣
仰體

聖心焦勞互相嚴督於徵收則督其上倉庫空則督其到次於新造修脩則督其晝夜僱工間有運官之延遲者在臣屬卽差官行提在隔屬卽移咨催赴至交兌一節責令遵照漕規軍不得橫索民不得勒捐小有違禁輒以三尺從事而道廳且躬巡水次縣官且親駐倉廩於是糧如坻積艘若雲連不出正月二十旬而舳舻銜尾相繼出江定可不違二月過淮之

欽限矣惟是臣屬漕遼二糧益以耗米數至二千餘

萬即使豐稔相仍已虞耗訕乃去歲巨浸淹禾
蘇屬被災各縣所收甚薄而糧又獨重臣等仰
籌

國計俯恤民艱恒恐輸將不前以貽

君父之慮乃念漕局幸竣臣得藉手報

命皆賴

皇上之天威振頓故諸臣咸協力急公得追後時之
功令也等因具題本月二十六日奉

聖旨該部查覈具奏欽此欽遵抄出到部該司查得

本部題定單例一款一議起兌開幫糧省直漕糧俱限十二月初旬大縣不過半月小縣不過十日領兌通兌開幫撫按具疏題奏限自正月爲始有司不完兌軍衛不開幫違限一月者各罰俸一年遲限二月者各降職二級違限三月者有司革職爲民運官降三級調衛差操等因遵行在卷今據應天巡撫

奏報六合等縣兌過神策等衛漕糧自崇禎四年十一月十三等日開兌起至崇禎五年正月二

十一等日各已兌完盡數起運出江其開兌開
幫悉皆遵照

欽限奉

旨查覈相應具覆案呈到部該臣等看得漕糧起兌
開幫爲運事之始實通漕遲速之根源也先經
臣部題有單例定之以限繩之以法期於恪守
遵行耳今查應天撫臣莊祖誨所屬漕遼二糧
正耗合算數至二百一十四萬一千三百餘石
已居全漕之強半不爲不多而起兌開幫始於

度支部奏
四年十一月十三等日完於五年正月二十一
等日悉遵

欽限曾未後時從此而過淮越閘抵壩固空可望一
蚤俱蚤皆仰賴我

皇上功令嚴明鼓勵羣工而撫按督催之力有司趨
効之勤亦可槩見矣恭奉

明旨著臣部查核具奏相應覆

請伏候

命下臣部行文各該衙門一體欽遵施行

崇禎五年三月十七日具

題本月二十日奉

聖旨據奏應天撫屬糧運兌發如期具見各官恪勤
任事知道了欽此

覆知府史應選輕齋解完開復疏

題爲輕齋隨糧之法當嚴道臣併催之職當盡謹
題明以重責成以免再誤事雲南清吏司案呈
崇禎四年九月初六日奉本部送戶科抄出巡
按直隸監察御史饒京題前事內稱崇禎三年
七月十六日奉都察院勘劄准戶部咨該總漕
部院李待問具題前事查叅蘇州府知府史應
選遲誤輕齋緣繇奉

聖旨督催輕齋責成糧道前二月初科疏奉旨已明

李待問何至今條奏該部曾否咨行著明白說來
這本內舊欠銀數著一併速催其直隸各道彙送
押運道臣逋罰仍各道自任准如議縣糧起解府
司寢閣係省直積弊史應選著住俸解完還著該
撫按官查明延誤緣繇具奏該部知道欽此欽遵
等因移咨備劄前來案經前按臣王道直通行
去後臣到任後復行署蘇松道事蘇州府知府
史應選查催隨據呈稱蘇屬輕齎崇禎二三年
分俱已全完惟崇禎元年銀兩原係前官未了

之局本府於二年七月初九日接任卽督催州
邑於十二月內共報完元年銀三萬七百九十
兩又七年分銀常熟報完四千兩崑山報完三
千兩據其報完自以爲幸隨卽定委衙官管解
而竟坐遲誤請得而細陳之輕齎錢糧往例解
淮新改解赴通州解戶施駿藩欲卸擔於解官
典史水文汀文汀懼累脫逃改委縣丞朱國欽
申詳院道耽延時日此遲誤之繇一也駿藩見
避通之責難辭又欲循解淮之例業已批駁尚

自觀望至三月方始兌完此遲誤之繇二也又
解戶金榜贖兌虧銀一百餘兩押完至四月初
一日始到此遲誤之繇三也又常崑二邑報完
之銀至四月初二日始到此遲誤之繇四也至
本府於四月奉委催督崑山漕糧交兌十八日
始竣事未免支左缺右此遲誤之繇五也就中
兌銀一節往時驗銀不兌至淮添補奸解比比
告求加派本府當堂兌足親付委官之手一時
雖覺稍遲而於後來稱便此遲誤之繇六也歷

歷真情一字不敢飾說今舊運已蒙紀錄而輕
齎又已完解伏祈寬其既往以勵將來等因到
臣復經批行蘇松道確查去後催據該道兵備
副使蔣英覆核無異呈詳到院該臣看得輕齎
隨糧

功令亦甚嚴矣然而尚多遲誤者以三吳錢糧原
有遲誤之通弊如緊要起解錢糧折封時不先
爲具解必至院道府催提之急乃先虛報完數
起批掛號此時錢糧尚有民間及至徵完起解

已就歲月此臣新餉雜項之疏一切報完者俱不敢作數如錢糧起解到府卽兌明待發猶可少挽其遲又置之外庫提解戶到日復票行各縣喚銀匠估銀色喚解役補輕頭甚至藏避不出屢提方到復設法交足不知又耽延幾許時日矣就中展轉瑣屑難以殫述而輕齎遲誤大半坐此如州縣拆封時卽將正項起解解府日卽輕易兌明如臣限十日銷批之說又何遲誤之有哉臣奉有查明之

旨謹直截入

告第據本官兩年輕齎俱已全解無欠則桑榆之收
或可徼激勸之典然而非臣所敢必也等因九
月初三日奉

聖旨該部查議具奏欽此又奉本部送戶科抄出應
天巡撫莊祖誨題同前事奉

聖旨已有旨了該部知道欽此欽遵通抄到部送司
卷查崇禎三年四月二十五日奉本部送戶科
抄出該總漕部院李待問會叅蘇州知府史應

選將天啓七年崇禎元年輕齋解府
人任意
遲延等因奉有

明旨李待問何至今條奏該部曾否咨行著明白說
來史應選著住俸解完還著該撫按官查明延
誤緣繇該本部隨將咨行日期于崇禎三年五
月初一日回

奏復奉

聖旨輕齋原係隨漕今漕務已槩責糧道豈輕齋又
有另屬前旨甚明不必曲解這所報行咨日次知

道了司府係錢糧總關竊數亟宜振剔若州縣捏
數虛報上官何不查叅以後著一體嚴核爾部再
通飭行欽此又經呈堂咨行該撫按去後隨於本
年六月初六日據解官宋國欽解到天啓七年
輕齎銀七千八百兩崇禎元年輕齎銀三萬五
百九十六兩零是應選遲延未解之銀俱已起
解到部所據巡按御史饒京會同巡撫莊祖誨
具奏史應選延誤緣繇并請開復相應遵

旨查議案呈到部該臣等看得輕齎爲糧運急需萬

不容緩蘇州知府史應選將各屬解到銀兩不
卽轉解業經總漕臣李待問題叅奉

旨住俸并查延誤緣繇已經臣部咨行在案今該撫
按會題以應選銀俱解到請爲開復恭奉

明綸著臣部查議具奏臣等稽之案籍天啓七年分
未解之七千八百兩崇禎元年分未解之三萬
五百九十六兩委經差官宋國欽解到矣前以
未解而住俸今以已解而開復理固應爾實非
徇也但前解之數止就已解府者而言而各屬

拖欠之數不與焉查該府屬未完在天啓六年
尚欠二千四十七兩一錢九分零七年尚欠三
萬一千四百七十兩九錢七分零崇禎元年尚
欠一萬九千七百九十兩三錢九分零臣部當
卽咨行該撫必俟催完舊逋方准請復而迄今
未報也又於去年十二月內列款題催奉有

明旨未完的責成見在有司業已通行限四月完解
雖前項欠數俱係以前縣令原非本官任內似
難舍其職詳而竟責之職要但前官已去若不

責之接管更有何人則該府亦難盡爲諉卸也
合無行令本官嚴督各屬照前拖欠追解完日
仍聽該撫按另題請復庶督催方有責成積逋
不致波逝而查叅亦可稱盡一矣旣經該撫按
會題前來相應覆

請恭候

命下臣部行文各該衙門欽遵施行

崇禎五年三月十九日具

題本月二十二日奉

聖旨據奏史應選解府輕齎銀兩雖已解部其各屬
欠數尚多何得遽請開復該司案呈殊屬蒙徇姑
不究欽此

覆內府工匠免食車戶疏

是貧匠乳獨可憫食報車戶難應懇乞

聖明照例豁免以杜朦害以濟成造事雲南清吏司
案呈崇禎五年二月二十八日奉本部送戶科
抄出西直房提督御馬監太監黃鍾育題前事
內稱陳所登乃本房裁縫凡成造

上用龍袞章服等件悉屬所登率領匠役承辦在房
供役有年在外並無生理今被食報車戶豈惟
身難兩役而且成造乏人此臣職掌攸關不獨

爲貧匠請

命也伏乞

聖明軫念龍袍造作隆重

准照局匠趙奉事例

勅下該衙門將陳所登運糧車戶照例除免庶

龍袍成造不致有悞而貧匠供役亦得安心等因

具題本月二十七日奉

聖旨陳所登准照例豁免既係該監匠役何故混報
車戶還著查明該衙門知道欽此欽遵抄出到部

送司查得大通橋車戶事在總督隨該呈堂咨
行查明去後於三月十三日奉本部送准總督
倉場尚書錢春咨稱正月二十三日據宛平縣
申解新倉車戶一名陳所登頂補李平名缺隨
票行大通橋訖續於正月二十九日該監移文
本部豁免本部查得崇禎四年四月內有兵仗
局太監王國治曾因局匠趙奉報倉車戶題奉
欽依豁免事例但解從兩縣收在該橋本部未便徑
豁也又於二月十三日該監復移手本內稱陳

所登藝顓

龍服不時成造果非虛名曠役車戶之食原屬警口
妄攀似難分身兩役合再知會豁免等因前來
該本部揭撥內開車戶一役先經本部題奉

欽依遇有逃亡消乏彙行宛大二縣倉報頂補本部
止據解到者發橋充役而已查正月內據宛平
縣申解陳所登頂車戶李平業經發橋今准揭
稱陳所登藝顓

龍服欲爲請

旨除豁是在該監核實徑題可也再行回覆去後二月二十七日接邸報該監太監黃鍾育業經具題奉有

明旨遵卽票行大通橋將陳所登除豁并行宛平縣查核報替三月初六日據該縣申稱先蒙本部批該大通橋呈報舊車戶李平等消乏報替等因到縣隨據李平等對報殷實陳所登替役卽取隣佑楊應科等甘結比時陳所登金無內監匠役免稟李平等所登殷實卽時具文申解

金無暗食那移轉本家前因除責令李平另
報殷實替役外擬合據實申報等因在卷今准
咨開前錄看得軍儲

國之大計車戶運中苦役舊者思脫新者不來向
時審定在於巡倉風憲官員猶能彈壓今奉

旨事歸兩縣雖親民則貧富易於周知然權輕則勢
力易於撓阻蓋

京師衙門甚多無非占役况近待交結律有明條
百工在內無從稽考果係局匠愈報既不明言

則仍聽憑請

旨豁免庶幾體統正而

朝廷尊假借清而豁免徑塞其在兩縣既不虞掣肘而
本部亦可嚴責成以爲軍

國計矣除陳所登遵

旨豁免無容再議外因查明涵報監役車戶緣繇亦
緣歷來原有題

請事例理合一併回覆等因到部送司案呈到部該
臣等看得大通橋車戶轉運倉糧最稱繁苦在

役者多至消乏頂替者必煩僉補至行宛大兩
縣僉報先經題奉

明旨厥有專責者也惟是苦役相加人多規避僉補
應運勢非得已今查陳所登報當車戶之繇據
宛平縣申稱舉報則有李平甘結則有楊應科
卽所登亦原無該監免票則初不知爲

內府工匠而報之今始知爲

內府工匠而免之總之不著一毫成心于其間也

相應圖

奏伏候

命下臣部欽遵施行

崇禎五年三月十九日具

題本月二十二日奉

聖旨知道了欽此

覆總督倉場截漕歸併總漕疏

題爲截漕歸併總漕部疏目明祗緣結處牽入督
倉恐起鑽管致茲觀望懇乞

聖斷以定羣心以重軍

國事雲南清吏司案呈崇禎五年三月十八日奉
本部送戶科抄出總督倉場本部尚書錢春題
前事內稱臣惟向來奸弁利於截留攬越管攘
無所不至先是總漕有輪幫坐派之議復該臣
條議有分幫輪派一款又經本部幾經推敲覆

請得

旨據云預已知會總漕臣遵照無異則臣之未便侵越猶之本部也况疏言四年見截尚足供五年春運今山東河南漕船見到津門者不知輪幫應截與否若係漕臣派截之數自宜留運不然而先到者臣部議截後來者總漕又截適以紊漕規而滋觀望則本部已鑿鑿乎知柄不可兩持矣及請

勅下該衙門乃忽挿入督倉二字何也一疏兩前後

自爲矛盾以致彼此不便奉行臣恐聲息一傳
漕臣未免束手則欲速得遲津門二運卽欲不
誤不可得耳夫部臣一身主計真是萬緒千端
獨謂兩司官案呈安容承訛襲舛草草一至此
極臣竊惑之伏乞

勅下戶部速查截漕旣屬總漕臣督倉有無可以于
與改正以便總漕遵行庶幾漕規不紊而邊運
亦有攸賴矣等因本月十八日奉

聖旨截漕係總漕專職司官案呈欠明知道了卿督

理軍儲且向經條議亦當一爲稽覈既稱兩省船
到津門內有截數漕臣曾否報部該部卽行查奏
仍速催找截以濟急需欽此抄出到部送司查得
五年分津門應截關寧薊永共該米六十三萬
五千九百八石除四年截過五年春運二十七
萬二千一百四十九石四升零又將簞羹抵補
及應追掛欠共三萬二千九百餘石外應再找
截本年米三十三萬八百五十八石九斗六升
補足本年春秋二運此外再預截六年春運三

十三萬石俱經開數具題奉有

俞旨今該督卽具題前事奉

旨下部查奏
臣等行總漕卽照輪幫坐派之例立刻
截定

奏報外其總漕曾否報部緣繇相應具覆案呈到
部該臣等看得天津截漕以應海運急需萬不
容緩但截留津糧較運入京通者省便居多故
官旗多以窺覘起釁營糧運輒以觀望致稽誤
先是崇禎二年總漕李待問條議有輪幫坐派

之法臣部覆議聽總漕于十三總內每歲輪流
兩總裁津週而復始奉有

俞旨嗣因虜變中止是年仍是督臣南居益撥派崇
禎三年因虜倣後津門收貯二年漕糧數多臣
部題

准免運入京卽作截數原未坐撥逮崇禎四年二月
內督倉錢春條議有分幫輪派宜行一欵欲以
截派仍

欽依而總漕四船已過淮派截不及于四月內具題

奉

聖旨津糧著總督倉臣就近查截其次運預行咨數
總漕衙門坐派不得遲誤欽此隨該督倉錢春于
五月內坐撥訖至七月內總倉移咨到部申明
前說臣部復咨總漕至十月內臣部預計五年
應截津糧又經移行總漕知會矣追邇數年以
來總漕督倉實更迭爲政今歲已議歸併總漕
尚未派定幫次臣部近覆津部截漕疏內原謂
是總漕職掌但後請

勅該衙門處於總漕下添入督倉二字臣之愚見以爲督臣職專軍儲况近奉

特勅且兼巡倉事務其於漕糧巨細無不當問與臣部無以異自難謂其全無干涉原疏始末語意自明更無遊移而督臣以爲矛盾爲訛舛則臣愚托重之意幾於晦矣恭奉

明旨謂督臣督理軍儲且向經條議亦當一爲稽查此正微臣意中事

皇上業已洞晰無餘臣又何容更置一喙也總之運

升旗甲垂涎截津一切鎖管無所不至督臣避之若浼自是高標卓行臣竊敬服乃臣實未嘗以截漕之事令總漕而獨累督倉也且今山東河南漕艘鱗次津門上下總漕尚無應截幫次移會到部想以舊例多截粳米不截粟米廼客歲薊永截留實有粳粟各半之議近日山東河南官旗有赴部告擾者臣皆深惡而懲警之則總漕自宜蚤有成議矣合無再請

勅下總漕衙門遵奉

明旨秉公截留或與巡漕御史會行如以鑽營爲嫌
惟當確守輪撥之議其經去年已截者不必再
截雖先經過淮而幫次在冊不得以不及面截
爲口實完日亟行具疏奏報請

旨遵行則紛紜之說自寢而觀望之端可杜矣

崇禎五年三月二十二日具

題本月二十四日戌時奉

聖旨知道了著遵前旨速行總漕酌定截留仍將所
截幫次報部不得稽悞欽此